



Siðareglur stjórnar Strætó bs.

- **Markmið og skilgreining**

Markmið þessara reglna er að skilgreina það hátterni og viðmót sem ætlast er til að kjörnir fulltrúar sýni af sér við störf sín í stjórn Strætó bs.

- **Starfsskyldur kjörinna fulltrúa**

Kjörnir fulltrúar skulu í störfum sínum fylgja lögum og starfsreglum stjórnar Strætó bs, sem og sannfæringu sinni. Þeim ber að gæta almannahagsmuna og hagsmuna Strætó bs. Þeir skulu í störfum sínum og í umræðu um málefni Strætó bs. stuðla að og viðhafa orð og athafnir sem samrýmast góðum mannlegum samskiptum.

Kjörnir fulltrúar hafa ávallt í heiðri grundvallarreglur góðrar stjórnsýslu í störfum sínum, þ.m.t. gagnsæja og upplýsta ákvarðanatöku og framkvæma ekkert það sem er til þess fallið að vekja grunsemdir um að annað en lögmæt og málefnaleg sjónarmið ráði för við stjórn Strætó bs. Kjörnum fulltrúum ber að starfa af kostgæfni, fyrir opnum tjöldum og vera reiðubúnir að rökstyðja ákvarðanir sínar og tilgreina á hverju þær eru byggðar. Þeir skulu bera ábyrgð gagnvart íbúum höfuðborgarsvæðisins í heild og svara fyrirspurnum almennings og fjölmiðla um störf sín með rökstuðningi fyrir aðgerðum eða starfsemi þjónustu sem þeir bera ábyrgð á sem kjörnir fulltrúar í stjórn Strætó bs.

- **Valdmörk**

Kjörnir fulltrúar gæta þess að fara ekki út fyrir umboð sitt í störfum sínum og virða verkaskiptingu í stjórnkerfi Strætó bs. Þeir sýna störfum og réttindum annarra kjörinna fulltrúa í stjórn og starfsmanna Strætó bs. virðingu.

- **Hagsmunaárekstrar**

Kjörnir fulltrúar nýta sér ekki stöðu sína í þágu einkahagsmuna sinna eða annarra sem eru þeim tengdir, hvort sem ávinningur af slíku kemur fram strax eða síðar, þ.m.t. eftir að störfum fyrir Strætó bs. lýkur.

Kjörnir fulltrúar skulu forðast hagsmunaárekstra í störfum sínum. Um hæfi þeirra við meðferð einstakra mála fer eftir 20. gr. sveitarstjórnarlaga, nr. 138/2011.

- **Gjafir og fríðindi**

Kjörnir fulltrúar þiggja ekki gjafir, fríðindi eða önnur hlunnindi frá viðskiptavinum eða þeim sem leita eftir eða veita Strætó bs. þjónustu. Í störfum sínum skal kjörinn fulltrúi forðast alla hegðun sem gæti talist fela í sér að veita eða þiggja óeðlilega fyrirgreiðslu eða mútur.

- **Upplýsingagjöf og trúnaður**

Kjörnir fulltrúar gæta þagnarskyldu um það sem þeir fá vitneskju um í starfi sínu og leynt á að fara vegna einkahagsmuna eða almannahagsmuna samkvæmt lögum og eðli máls. Trúnaðurinn helst áfram eftir að kjörnir fulltrúar láta af störfum.

Kjörnir fulltrúar virða trúnað um ummæli einstakra fundarmanna á fundum stjórnar Strætó bs, sem og um innihald skjala eða annarra gagna, sem þeir fá aðgang að vegna starfa sinna og trúnaður skal vera um, enda byggji hann á lögmætum og málefnalegum rökum.

- **Að virða hlutverk starfsmanna**

Kjörnir fulltrúar skulu í störfum sínum virða hlutverk starfsmanna Strætó bs. Þeir mega ekki hlutast til um að starfsmenn geri neitt það sem hefur þann tilgang að verða kjörnum fulltrúa á beinan eða óbeinan hátt til hugsanlegs ávinnings, né heldur aðila nátengdum honum eða ákveðnum hópum eða fyrirtækjum.

- **Stöðuveitingar**

Kjörinn fulltrúi skal ekki gera neitt sem veitir honum sjálfum starfslegan ávinning í framtíðinni eftir að hann hefur látið af störfum sem kjörinn fulltrúi. Kjörnum fulltrúum ber að koma í veg fyrir að einstaklingum sé veitt starf eða stöðuhækkun hjá Strætó bs. á öðrum forsendum en hæfni til að rækja starfið og gæta þess, þegar þeir koma sjálfir að ákvörðun um val á starfsmönnum, að hæfasti umsækjandinn hljóti starfið.

- **Miðlun siðareglna til kjörinna fulltrúa, starfsfólks, aðildarsveitarfélaga og almennings**

Kjörnir fulltrúar undirgangast þessar siðareglur með undirskrift sinni og lýsa því þar með yfir að þeir ætli að hafa þær að leiðarljósi. Siðareglurnar skulu vera aðgengilegar starfsfólki Strætó bs, eigendum Strætó bs, almenningi og fjölmiðlum á heimasíðu Strætó bs. og annan þann hátt sem stjórn ákveður til að þessir aðilar geti gert sér grein fyrir meginreglum þeirra.

Siðareglur þessar skulu teknar til umræðu í stjórn Strætó bs. við upphaf hvers kjörtímabils stjórnar.